

AMAL TABIAT DAN SIKAP BAIK YANG DIUTAMA OLEH ISLAM - PM

KUALA LUMPUR 31 Dis. - Perdana Menteri, Datuk Sri Dr. Mahathir Mohamad berkata, penerapan nilai-nilai Islam janganlah ditumpukan semata-mata kepada larangan dalam Islam tetapi sebaliknya hendaklah diamalkan tabiat dan sikap baik yang diutamakan oleh Islam.

"Kerajinan, amanah, kejujuran, bertimbang rasa dan bertanggungjawab adalah nilai-nilai yang mulia dalam ajaran Islam dan masyarakat Islam mestilah mengamalkannya," ujar beliau.

Dalam perutusan tahun baru 1984 yang disiarkan oleh Radio dan Televisyen Malaysia malam ini, Perdana Menteri memberitahu, bagi orang bukan Islam, nilai-nilai ini juga dipandang mulia dan tidaklah timbul percanggahan jika mereka mengamalkan nilai-nilai tersebut.

Katanya, dengan ini maka masyarakat majmuk di Malaysia akan lebih kuat perhubungannya dan segala kebaikan yang datang dari amalan tersebut akan dikecapi oleh semua rakyat dari semua kaum dan agama.

Perdana Menteri berkata, kestabilan, kemakmuran dan suasana aman damai yang dinikmati adalah satu rahmat besar yang dikurniakan oleh Allah dan adalah menjadi tanggungjawab rakyat menentukan supaya keadaan ini terus kekal abadi.

Tegasnya, kerajaan sentiasa menjalankan berbagai ikhtiar untuk menghapuskan kemiskinan dan bezam untuk mencintakan kehidupan yang wajar dan sempurna untuk seluruh rakyat yang rajin dan sanggup berusaha.

Di samping itu, tambah beliau, kita sepatutnya tidak terlalu ghairah dengan kebendaan dan mengukur sesuatu semata-mata dari segi keuntungan jangka pendek diri kita.

"Perasaan tamak jika dijadikan asas kehidupan tetap akan merosakkan masyarakat dan membawa bermacam-macam petaka," katanya.

Oleh itu, ujar beliau, dalam menjalankan tugas, janganlah berfikir semata-mata tentang upahan, tetapi juga terhadap kemuliaan khidmat yang baik dan jujur.

Perdana Menteri berkata, sumbangan dan sokongan serta perpaduan rakyat telah memperkuatkan

keyakinan kerajaan dalam mengatasi masalah-masalah, khususnya isu pindaan perlembagaan yang telah dapat diselesaikan menurut cara dan tradisi negara ini.

Tegas beliau, tidak ada masalah yang tidak dapat diselesaikan tanpa sokongan rakyat dan kerajaan berikrar akan terus memelihara sistem demokrasi berparlimen dan raja berperlembagaan di negara ini.

Perdana Menteri juga menyeru semua lapisan rakyat bekerja kuat dan mengamalkan etika kerja yang baik dan berganding bahu menjayakan dasar-dasar yang dibuat oleh kerajaan.

Katanya, tidak ada dasar atau konsep dalam dunia ini yang baik seratus-peratus tetapi sebagai makhluk yang boleh berfikir kita boleh buang yang keruh dan ambil yang jernih.

Datuk Sri Dr. Mahathir menambah, dasar dan konsep kerajaan tidak banyak mempunyai aspek keruh dan tidak perlu menghabiskan masa membahas dengan panjang lebar tentang kebaikan dan keburukannya sementara dasar tersebut dibiarkan tanpa diamal dan dilaksanakan.

Menurut beliau, meskipun negara turut mengalami kesan-kesan buruk akibat kemelesetan ekonomi dunia, tetapi dengan berjimat cermat dan dasar fizikal dan kewangan yang realistik serta praktikal, negara dapat menghadapinya dengan berjaya.

Jelas beliau, peluang-peluang perniagaan dan pekerjaan tetap wujud dan taraf kehidupan rakyat pada umumnya tidak terjejas akibat kemelesetan ekonomi.

Perdana Menteri menyatakan, keadaan keselamatan negara juga adalah terjamin dan bertambah baik di mana pasukan bersenjata terus teguh dan bersedia menghadapi apa juga cabaran.

Beliau juga menyeru rakyat berganding bahu, bekerja dan menunaikan kewajipan masing-masing dengan tekad dan azam yang lebih kuat.

Matlamat kita, tegas Datuk Sri Dr. Mahathir Mohamad, ialah mewujudkan satu keadaan di mana setiap rakyat dapat hidup bahagia dan sempurna dan menegakkan negara Malaysia yang maju dan berma-ruah.